

陰陽正宗畧引



陰陽正宗略引

陰陽正宗略引前敘

道生一。一生二。二者一陰一陽也。天地之生成。人物之聚散。德業之盛衰。古今之所以成終成始。皆此陰陽爲之也。陰陽之義大矣哉。其釀而爲凶與害者。陰陽之偏勝也。至真陰真陽。一太極而已。冒天下之道。有吉利無凶害。而又因以明利害。定吉凶。此易之所以爲書也。然其道變動不居。神而明之。存乎其人。苟非其人。道不虛行。陰陽正宗者。原本於易。漢書云。易本隱以之顯。正宗有易之隱。而較易爲淺顯也。開宗以大學明義。亦易教也。明德。自強不息也。親民。厚德載物也。止於至善。思不出其位也。三者括易之全體也。次天地。列乾坤也。次人生。兼三才也。次性命。明易簡也。次圖說。尙象像也。次時學。徵利用也。次問答。窮擬議也。終十目。猶十翼之旨也。易教也。大學之道也。慨自大道不明。天下多得一察焉。以自好。入者主之。出者奴之。守一先王之教。皆以其有。爲不可以加。實則猶耳目口鼻手足。雖各有所長。相用而究不能相通也。甚者由正入邪。由邪出正。歧中又歧。道術遂爲天下裂。故卽大本大

原所在。撮其體要。庶後之學者。略有以見天地之純。聖賢之奧。一成不變。而萬變不離其宗。譬如至虛至靈之心。人莫見其有所爲也。而聰明強健之著於百體。莫不惟命是從。是書其卽以淪人虛靈之心歟。宜古宜今。宜中宜外。孟子謂先聖後聖。其揆一也。陸子靜謂四海各有聖人出焉。此心同也。此理同也。是矣。

陰陽正宗略引後敘

一日有十二辰。午之光明異於子。一年有十二月。夏之富麗異於冬。變化因時。大業所由獨新也。變而有不變者。寓其中。子至午。冬至夏。無非此一元。自爲終始。盛德所由萬古常新也。人事原出於天道。天地革以成化。乃守舊者。不知去故之外取新。天地恆久不已。乃驚新者。不知溫故之中有新。兩相背馳。皆不利於時矣。利於時者莫如易。陰陽不測。咸利於貞。貞者正也。萬變不離其宗。斯卽陰陽正宗一書所由昉焉。篇首冠以大學者。所以明變化無方。皆不外此常道也。難之者曰。迄今學問日新。政治日新。世界日新。書理愈出愈新。以憂憂獨造爲上乘。守常不變。誠屬迂闊而莫爲應之。曰。著書徒以新入耳目乎。大學自幼爛熟於口。非新也。將欲舊染汚俗。咸與維新。則定靜以養其源。致虛生明。新機日啓。格致以窮其理。博聞強識。新學自賅。由是而誠意正心。存是去非。有治人自有治法。天下之大。可恃者惟此。本原既植。新義自妙於無窮。且善言古者。必有驗於今。

驗於中國之居今稽古者無論矣今所重者西學驗於公法之多符於古者亦

無論矣。西學最要者富強。計學家有曰大利所見必其陋。益亦庶幾。大學繫矩之道。可見古今中外得其真者無異學也。特其言未行於天下。故下卽人所共知者言之。

今皆羽毛是豐如禽獸乎。猶是手足同具之身也。胡不修。今皆聚散無常如禽獸乎。猶是男女正位之家也。胡不齊。今皆遷徙靡定如禽獸乎。猶是上下相維之國也。胡不治。若徒知開民之智。爲身計。爲家計。爲國計。計在富強。而不知所以平其富強。進於富強。終非長治久安之道。大學則有以探其源。持其後也。獨至一切制度。削而不載。非不屑也。因時制宜。書不盡言。言不盡意。惟存其大體。日新又新。必有政事。以新民新命。如一元之渾淪於天地。五行百物。隨時並妙敷施。環球萬國之新書。有能超出大學之範圍哉。是在善學者。默有以會其通耳。

## 重刊陰陽正宗略引序

此書爲

師尊三十年前所著。原版在重慶。刷印無多。春間同仁寄來一冊。擬即翻印。並特向

師尊請示原委。承 誨之曰。我自十九在青城山。明心見性後。瞭然於大道之生天、生地、生人、生物之由來。與人在後天。宜如何存心養性。歸根復命。返還先天之究竟。默識於衷。未敢輕發。至三十覺可以著書。始將覺悟所得。筆記出來。並將先後天性命顛倒。乾坤坎離。錯綜變化。凡陰陽二氣所含之一切微妙義理。畫成圖像。詳加說明。窮十年之力。積稿至十二卷。定名爲陰陽正宗。其時在已經捨棄產業以後。家况窘迫。晝間營生計。寸晷無暇。夜間秉筆燃桐油燈照明。爲惜油計。苾草細捻如綫。顧油雖省而目力耗。幾爲之瞶。耳亦爲之減聰。頭骨更咀啞作響。身體之勞瘁可知。書稿雖成。無力發刊。徧向親友告貸。無一人肯應。甚且受其奚落。孟子所謂勞其筋骨。餓其體膚。困

乏其身。行拂亂其所爲者。我實皆一一經驗過來。隣有七十餘老人周某。固多病。見我書稿奇之。知我有道。求却病之法。當授以初步命功。伊行之數日。其病若失。益信大道之神妙。自言願捐錢二百串。刊版印書。我以其言爲實。僱就匠人。將開工雕刻。而周某因其子阻撓。中途翻悔。所許之錢無着。而事已至此。實欲罷不能。無可奈何。只摘書中綱要刊印。成爲一卷。改名陰陽正宗略引。較之全稿。尙不及十分之一。書旣成。適當臘底年盡。欠工錢三串。不能結束。遂將書親送某至戚一閱。意欲向其告借。如數以竣其事。伊閱書。初滿口稱贊。及告以來意。遂支吾其詞曰。爲善固所素願。不過目下產業未置全。後人未安妥。俟諸事完畢後。定當儘力相助。等等費話。說了很多。終竟一毛不拔。爾時制錢三串。以現在北平銀元合之。約值五角三分。如此少數。乃張羅十餘日。不能到手。後不得已。當賣衣物。償還工資了事。此事至今思之。猶有餘慨。前年聞周某。及某戚家。已凋零不堪言狀。足見吝財者。仍不保其財。此固由伊等福命淺薄。不能結道緣而沾道光。亦因我爾時躬行未逮。尙



不足以傳世。故上天假手於人以阻阨之。今雖底稿已軼。將來世界大同。成功以後。當仍將未刻之重要圖像。補畫完全。以爲天下萬世法。偶爾感觸往事。特述其經過。使汝知行道辦道之艱難。並知道之貴重。非有大福命者。卽欲一結道緣亦不易也。愚不能文。謹錄師訓以爲序。

甲戌年仲秋月上浣

弟子劉登道敬誌

陰陽正宗略引目錄

大學敘言

問答條說

大學附解

問答偶記

天地敘言

十目敘言

天地論略

師言約誌

人生敘言

人生論略

性命敘言

性命論略

性命圖說

時學敘言

時學論略

## 大學叙言

大學一書。乃萬教之綱領。天所以廣大道之傳也。首明大道全體。次明入道之功。至能得而大道已盡。物有四句。申結上文。此古書也。下則孔子之助詞。孔子幼師項橐。從事小學。長夢周公。潛志大學。壯欲究周公制作之原。問禮老聃。得聞大學至善之道。後人編大學入禮記中。良有以也。朝聞夕死之嘆。其此時乎。後遊歷列邦。道不行而轍還東魯。刪訂纂修。而約以大學。自是古今之變化。有經書一以貫之。經書之博大。有大學一以貫之。大學之次第。明明德一以貫之。顏子問仁。告以克己復禮。禮即適周所問。曰。天下歸仁。即明明德於天下之旨。顏子既卒。慟一貫之道不傳。惟曾子其庶幾也。呼之曰。參乎。吾道一以貫之。曾子釋之曰。夫子之道。忠恕而已矣。厥後作傳。始以毋欺。忠也。終以絜矩。恕也。明明德也。家國天下。一以貫之也。傳至子思。乃作中庸。天命之謂性。爲大學探其原也。率性之謂道。明明德。眞諦也。修道之謂教。親民。眞諦也。書末終以無聲無臭者。爲至善窮其妙也。又曰。中者。天下之大本。忠也。和者。天下之

達道。恕也。明明德也。天地萬物。一以貫之也。曾子仁者。仁者見之謂之仁。大傳故多大學之實行。子思智者。智者見之謂之智。中庸故多大學之精義。合兩書而大道已全。察以精心。行以果力。盡人合天之奧在是焉。嗚呼。自有天地。卽有人。有人卽有大學。而由皇古以迄今日。明明德於天下者幾何。非大學之厄窮。乃斯人之不幸也。夫大道之行。關乎天下人之福命。天下人不明不行。而一二人明之行之。是自造其福也。導千萬人明之行之。造千萬人之福。而實積千萬人之福於一己也。尋真樂者自得之。

大學附解

大莫載而小莫破。前無始而後無終。有不能狀其所以然者。曰無極。無聲無臭。而天地人物之理。無一不備。曰太極。一元運行。陰陽不測。變化各正。保合太和。圓滿無虧。適以還其太極之體。無極者太極之體。太極者無極之用。大學之道。彌六合。亙古今。無處不宜。無時不趣。無爲而無不爲者。即無極而太極也。在明明德。道不遠人。其未發也。氣渾於虛。心則無思無慮。發則氣與天地相通。覺吾身非小。從心所欲。無些微私欲雜之。靜而無靜。動而無動者。即一元運行。陰陽不測也。在親民。民同此心。心同此理。民不能全其天理。即己之心有未全。裁成輔相。咸與維新者。即變化各正。保合太和也。在止於至善。盛德至善。有一無二。加一毫不得。損一毫不能。心與氣渾合其中。亦無一毫加損者。即圓滿無虧。適以還其太極之體也。此即現成以示人性命之在先天然也。心者性之質也。氣者

命之充也。心氣原不可分。由性命原非二物。但修命雖根于心而氣爲重。修性不外乎氣而心爲重。故就其所重者分之。要之一而二。而一也。

凡人落

在後天。欲返先天。有勉強之功焉。擇師訪友以明道。博學深思以明其道之

善。然後知性與命。實相感相應。心始不爲外物所搖。知止而後有定。先立乎其大者。非禮雖紛紜續至。而心不敢馳於外。氣則必歸於根。寂然不動。百感咸忘。定而後能靜。存其心。養其氣。日積月累。心自不爲嗜欲所棲。元氣流行。無罣無碍。天之空也。地之闊也。有無入而不自得也。靜而後能安。理益融洽。心益分明。事雖有是有非。且有非中之是。是中之非。而竭其心思。自會萬殊於一本。安而後能慮。知之既真。處之必求其當。事之在一身者。無不中其心。以自盡。事之在天下者。無不如其心。以相償。心純乎理。理宰乎氣。直養無害。則塞於天地之間。慮而後能得。得則由後天之性命。復還先天之性命。然性命混成則爲物。物有本末。本爲先天。末爲後天。事有終始。滄滌凡心。調和元氣。後天之人。事既終。先天之眞性眞命。卽於是始。知所先後。知性命所以合在先天。無有不善。知性命所以分。在後天。方有不善。既知善皆我固有之。非由後起。而用功不迷所向。則近道矣。孔子恐人不得其門而入。條分之貫串之。切實發揮曰。古之欲明明德於天下者。先治其國。大同不外乎小也。欲治

其國者。先齊其家。致遠不外乎邇也。欲齊其家者。先修其身。求人不外乎己也。欲修其身者。先正其心。制外不外乎中也。欲正其心者。先誠其意。養和不外乎嚴也。欲誠其意者。先致其知。化氣不外乎神也。神也者。妙萬物而爲言者也。致知在格物。神之格思。不至虛懸無薄也。功之進者。效自進。物理物欲。辨之既明。欲無所藏。則虛理無所蔽。則靈物格而後知。至理之所以範圍乎我者。至樂而非苦人之具。則除欲直若除寇。惟恐害之抵隙而來。知至而後意誠。善念既眞。惡念愈化而愈淨。憧憧斷絕。天性之本然自復也。意誠而後心正。天君泰然。流露於百體間者。皆元氣之所爲。血氣惟相與從令。心正而後身修。視聽言動。無黨無偏。同此五官百骸者。觀感自有同情也。身修而後家齊。本此孝弟慈而推廣之。老有所終。壯有所用。幼有所長。家齊而後國治。人不同姓。卽不同氣。既聯一氣於百姓。萬姓自彌綸於一氣之中。國治而後天下平。夫天下者。天下人之天下。無一人可辭其責也。平者上下四旁。各不相爭之謂也。蓋爭出於人與人相接。則齊家治國平天下要焉。實出於情與

情相攻。則格物致知。誠意正心要焉。而運動其間者惟身。自天子以至於庶人。豈是皆以修身爲本。則無爲而治矣。其本亂。物不格。知不致。意不誠。心不正。身自不修。乃內則恃採鍊之末以超凡。外則恃政事之末以移俗。皮之不存。毛將安附。而末治者否矣。所謂治者。至治馨香。感於神明。斯爲務本之治。第本之全體大用。層累不窮。至厚也。其所厚者薄。道有明有未明。德有至有未至。竟欲身入聖神。天下熙皞。而其所薄者厚。未之有也。大學之道。上不言神奇。下不言技藝。獨兢兢於德。幾若迂闊而莫爲。然而德者本也。此謂知本。試思天地之本在一元。形形色色。化育無窮。知本則正德利用厚生。與乾之至健同。德行恒易。以知險也。與坤之至順同。德行恒簡。以知阻也。此謂知之至也。先天而天弗違。後天而奉天時。一大道之莫載莫破也。一大道之無始無終也。至矣盡矣。蔑以加矣。此從古本篇末有此謂知本。此謂知之至也。



## 天地叙言

昭明莫如日月。人所共見者也。震驚莫過雷霆。人所共聞者也。有生而盲者。喻以捫燭叩盤。不能釋疑以實其見。有生而聾者。狀以破山喪七。不能啓悟以實其聞。凡人之蔽於見聞也。類如是。况天之大地之廣。實有非見聞所能及者。然欲知道之非虛。不覈諸散殊則無據。欲知人之非小。不究其原本則無因。茲卽共見共聞。與限於見聞。而理有不爽者。渾言之。略記之。以俟志在大學者。致曲有誠。誠則明。明則前知如神。上天下地。不行而至。天地自瞭如指掌。然後嘆大哉道也。天地原非大矣。